

Fondacija Centar za javno pravo nakon interne evaluacije skupa o upravljanju javnim preduzećima (*Upravljanje javnim preduzećima i ustanovama u Kantonu Sarajevo*, održan 28. svibnja/maja 2019. godine) koji je organiziran u suradnji sa Ministarstvom pravde i uprave Kantona Sarajevo donosi sljedeće

### *preporuke:*

(1) Preporučuje se Vladi Kantona Sarajevo i resornim ministarstvima Vlade Kantona Sarajevo da pristupe izradi jedinstvenog Akcionog plana provedbe Zakona o finansijskom upravljanju i kontroli (Službene novine Federacije BiH 38/16) kao i podzakonskih akata. Cilj je uspostava zajedničkih principa i jednoobrazne primjene sistema finansijskog upravljanja i kontrole kod svih javnih preduzeća, javnih komunalnih preduzeća i javnih ustanova čiji je osnivač Kanton Sarajevo.

(2) Da se u cilju efikasne realizacije Akcionog plana iz tačke (1) ovih Preporuka nametnu sljedeće obaveze svim javnim preduzećima, javnim komunalnim preduzećima i javnim ustanovama čiji je osnivač Kanton Sarajevo:

- da svoje poslovanje podrede principima transparentnog, ekonomičnog, efikasnog i efektivnog upravljanja javnim resursima i javnim sredstvima;
- da u skladu sa gore navedenim propisima uspostave sisteme internih finansijskih kontrola i interne revizije;
- da postignu potpunu pouzdanost finansijskog izvještavanja;
- da se poslovanje nedvojbeno podredi postizanju ciljeva i misija svakog poslovnog subjekta zasebno, uključujući obavezu ispunjenja smjernica i politika pružanja javnih usluga u Kantonu Sarajevo.

(3) Preporučuje se Vladi Kantona Sarajevo i resornim ministarstvima Vlade Kantona Sarajevo da pristupe izradi sistema praćenja rezultata poslovanja i normiranja poslovnih učinaka kod svih javnih preduzeća, javnih komunalnih preduzeća i javnih ustanova čiji je osnivač Kanton Sarajevo, posebno poduzimajući sljedeće:

- da u potpunosti uredi/definišu kontrolne aktivnosti kojima će se pratiti ostvarenje godišnjih ciljeva i rezultata poslovanja svakog pravnog lica;
- da u potpunosti uredi/definišu metodologije izvještavanja resornih ministarstava Vlade Kantona Sarajevo o izvršenim poslovnim aktivnostima u skladu sa godišnjim programima i planovima rada, kako bi se na jednoobrazan i sistematizovan način mogao obavljati nadzor i praćenje rezultata poslovanja, posebno u slučajevima u kojima pravna lica kontinuirano bilježe gubitke u poslovanju i u kojima su javna preduzeća, javna komunalna preduzeća i javne ustanove bili primaoci budžetskih subvencija ili bilo koje vrste transfera iz Budžeta Kantona Sarajevo;
- da definišu i javno objave normative i procedure praćenja i nadzora svih faza rada javnih preduzeća, javnih komunalnih preduzeća i javnih ustanova čiji je osnivač Kanton Sarajevo, uključujući i cijene usluga ukoliko su one određene odlukama nadležnih organa uprave Kantona Sarajevo i/ili su subvencionirane.

(4) Da se u cilju efikasne realizacije Akcionog plana iz tačke (1) ovih Preporuka nametnu sljedeće obaveze svim javnim preduzećima, javnim komunalnim preduzećima i javnim ustanovama čiji je osnivač Kanton Sarajevo:

- da svoje poslovanje usklade sa najvišim standardima etičnosti i integriteta, što uključuje nultu stopu tolerancije prema korupciji, i uspostavu mehanizama zaštite imovine od neovlaštenog prisvajanja, korištenja ili otuđenja, mehanizama sprečavanja i otkrivanja korupcije, kao i zloupotreba službenog položaja, prevara i grešaka;
- da obavezno donesu i primjene planove integriteta (svako pravno lice zasebno);
- da uspostave mehanizme transparentnog, javnog izvještavanja o radu i rezultatima poslovanja (unaprijed određene metode determiniranja kategorija uspješnosti godišnjeg poslovanja, kako bi i razmatranje godišnjih izvještaja moglo rezultirati predvidivim rezultatima);
- da uspostave mehanizme kontinuiranog monitoringa, procjene i unapređenja planova integriteta za svako pravno lice zasebno.

(5) Preporučuje se Vladi Kantona Sarajevo da u cilju jačanja upravnog nadzora nad poslovanjem javnih preduzeća, javnih komunalnih preduzeća i javnih ustanova čiji je osnivač Kanton Sarajevo, razmotri uspostavu vladinog koordinacionog tijela za sinhronizirano djelovanje i koordinirani nadzor nad aktivnostima, procesima, postupcima i mjerama koje su predložene.

Za FCJP

Sarajevo, 05. 06. 2019.

predsjednik prof. dr. Edin Šarčević